

求恕齋
叢書

雪橋詩話

四

雪橋詩話卷第四

遼陽楊鍾義撰集

吳興劉承幹參校

施南堂爲靖海侯琅仲子康熙二十四年以蔭授江南
泰州知州廉強有聲二十七年淮安下河被水詔遣兩
大臣涖州督隄工從者驛騷白其不法者治之是年湖
廣兵變援勦官兵過境具芻糧以應而令人各持一梃
列而待有犯者立禽治之兵皆斂手去二十八年以承
修京口沙船遲緩部議降調督臣傅拉塔以南堂清廉
公直題留尋擢揚州知府其次海陵詩云去此時春暮

來過屆早秋馬嘶知舊陌人語識同游寮佐迎新守兒童喜故侯停舟未忍別一爲問春疇累官漕運總督五十九年陝西大旱廷議輓河南粟二十萬石給關中詔赴豫勘河南府至西安黃河運道乃自孟津歷砥柱上龍門山陝州達西安量地險易縡路通阻酌舟運多寢有差其年冬詔發帑金五十萬合陝屬常平倉粟一百三十六萬餘石賑饑民南堂總其事因歷陝境分十二路按口分給明年夏得雨乃歸六十一年卒

富察文端公福敏號湘鄰丁丑庶常散館歸班世宗在藩邸時深知之召授諸子讀時

高宗沖年初就外傅雍正癸卯授閣學累官大學士乾隆二年謝病仍在上書房行走二十一年卒四十四年御製懷舊詩稱爲龍翰福先生六十年釋奠禮成贈太師其夏日侍皇子瀛臺讀書偶成云物我相關方是學騎矜方見便非欽舉筆納規具見師道之重

朱涵齋閒青堂集伊學庭奉御書賜扇歸省詩云天上揮豪絢綵明雲邊頒賜到蓬瀛童年殿上談神穎舊學宮中念老成又八月六日爲伊學庭作云聖代由來重文字才似鄒枚咸入侍昔日甘泉詔賦詩君家二阮稱能事學庭名伊都立伊爾根覺羅氏相國文端公伊桑

阿子年十三膺己卯鄉薦曾拜御賜由內務府員外郎
累官雲貴總督有嘉樂堂詩集蔡方山師移居句云自
惜子雲多寂寞從今曼倩更詼諺其冰玉道人明善堂
集一序類魏晉人駢儻文弟翼庭名伊爾謹有印月齋
詩集其祭竈述懷云深屋孤燈形影親情懷擾擾未歸
人欲拚白紙驅窮鬼焉得黃羊祀竈神嗜飲難瘳消渴
病耽吟有累折腰身今宵試覓還鄉夢嘉樂堂前辦早
春其別業在天開山涵齋詩有云草堂日暖櫻桃熟山
圓春晴筍蕨鮮擬駕短轍雙拄杖雲山幽處訪詩仙
寫景之句如柴虎臣寄陸景宣歸河渚云春雨草連郴

市沒曉風花傍戰場開周元亮南浦橋亭望夢筆山云
西山夢冷花藏寺南浦人來雪壓城羅琢山明經萬成
自吳門歸裏舟中卽目云野隴無人閒臥犧遙郵過雨
亂飛鴉杳初白重過齊天坡云人來天際斜陽影馬踏
雲中落葉聲樓上看雨云牆缺雲流山影去樹頭風截
雨聲來惲正叔句云疏林夜徑寒谿影隔岸秋亭落葉
聲申甫笏山句云幾日閒眠關竹戶一番細雨長秋花
厲樊榭句云春深城郭渾如畫定裏鶯花不屬僧彭芝
庭句云漁唱數聲初出港樵風兩岸送歸船抒情之作
如初白與顧梁汾舍人次閣學韓公韻云往事相關某

已散秋風纔到鬢先知錢田閒以投贈先君子詩初白
名遺字尊人

逸遠

見示感而次韻云詩貪記憶關心讀話到蒼涼

掣淚聽無錫褚廷棻元旦云百年又復添今日一事何
曾及古人呂大風太守磻宿竹林寺因懷純久夜不成
寐云一去陶潛門有柳近來周朴寺爲家怡仙方伯佛
喜寄內云已遲婚嫁歡情少爲歷饑寒絮語多邊塞之
作如魯齋光祿文明夜宿拜達里城外云天敲平野星
垣濶風市層霄月暉黃拙菴老人明泰塞上詩云門外
青燐低叫鬼道邊白骨久生苔僖承之明經出塞云山
殿老狐秋拜月戰場新鬼夜呼人山林之作如金廷襄

雲景句云爲辭逋客遲開徑恐礙歸雲矮築牆石東鄰
水甯句云無多生計初閒圃有限知交半在山汪杜林
應銓句云客屢款門刪牘語僅初移竹間栽方羅泰介
昌句云野泉鑿壁安新甕古木穿牆曬舊衣皆清切不
襲陳因自成馨逸

圖理琛字瑤圃阿顏覺羅氏初任內閣侍讀緣事罷官
康熙五十一年給原銜出使土爾扈特初土爾扈特汗
阿玉奇從子阿喇布珠爾嘗假道準噶爾赴西藏謁達
賴喇嘛已而準噶爾台吉策旺阿喇布坦與阿玉奇搆
怨阿喇布珠爾不得歸請內屬詔封貝子賜牧嘉峪關

外黨色爾騰嗣阿玉奇遣使薩穆坦入貢

聖祖憫阿喇布珠爾欲遣歸且欲悉所部要領至是命
瑤圃偕侍讀學士殷扎納郎中納顏宣諭勅旨頒賜恩
賞由喀爾喀假道俄羅斯五月自京啟行七月達俄羅
斯境駐楚庫柏興以假道故俟其國察旱汗信五十二
年正月信至始行由烏的柏興越柏海爾湖而北抵厄
爾庫城其駐托波爾之噶噶林遣屬博爾科泥來迎噶
噶林者彼國所稱總管也言噶噶林令迎天使由水路
行而昂噶拉河冰未泮請駐俟之五月由昂噶拉河乘
舟抵伊聶謝柏興登陸閏五月抵麻科斯科復乘舟由

揭的河順流而行所經者曰那里穆柏興薩瑪爾斯科
狄穆演斯科七月至托波爾噶噶林名馬提飛費多里
魚赤者迎至署留八日仍遣博爾科泥護之行抵雅班
沁登陸由費雅爾和土爾斯科城越佛落克嶺抵索爾
喀穆斯科以路滄守凍十月始行所經者曰改郭羅多
黑林諾付喀山西穆必爾斯科十一月至薩拉托付是
爲俄羅斯與土爾扈特界水自東北來折而南俄羅斯
呼爲佛爾格土爾扈特則呼爲額濟勒阿玉奇汗駐牧
地曰瑪努托海距此十日程以雪盛不能行五十三年
四月阿玉奇遣臺吉偉徵等來迎五月渡額濟勒河喇

布珠爾之父納扎爾瑪穆特遣獻馬卻之六月朔至瑪努托海阿玉奇擇吉聽宣勅我使語之曰阿喇布珠爾已賜爵優養欲遣歸爾牧以策妄阿喇布坦惡爾恐戕之爾若欲令阿喇布珠爾歸當自俄羅斯來迎阿玉奇曰我雖外夷然冠服與中國同俄羅斯乃嗜欲不同言語不通之國也天使歸經其國當察其情俄羅斯若以往來數故不假道則我無由入貢中國矣阿喇布珠爾荷厚恩與歸土爾扈特等復何疑慮於是阿玉奇及納扎爾瑪穆特等各贈馬及方物我使以越境無外交卻不受阿玉奇待之有隆禮留十四日筵晏不絕復附表

奏謝遂由舊路歸俄羅斯遣護如初五十四年三月還京是役也往返三載又數月經行三四萬里蓋土爾扈特爲俄羅斯所隔遠阻聲教而俄羅斯又故導我使紓道行瑤圃自奉使及反命無辱焉旣歸因述其道里山川民風物產以及應對禮儀隨日記載爲異域錄二卷呈覽

聖祖深加獎悅特授兵部員外郎旋擢郎中雍正三年巡撫陝西入爲工部侍郎阿拉布珠爾亦遂留牧黨色爾騰不復遣再傳至其子丹忠於雍正九年遷牧額濟內河乾隆三十六年土爾扈特全部內附而所記俄羅

斯南路十四國乾隆乙亥以後無不膜拜受封悉主悉
臣蔡亮功瑜題異域錄云秋空軫宿湛光芒知是文星

照異方玉節高懸天外影繡裳輕颺月中香風凝酪粥
冰心潔沙捲氈廬鐵面涼一物一情端著述獨留奇石
在奚囊翻水文章擬八叉太平天子重皇華裝無陸賈
千金橐氣壯張騫萬里槎草木舊曾霑雨露衣冠新許
煥雲霞鄂羅斯地輶車返從此乾坤總一家甘肅知縣
明福有指畫土爾扈特投誠圖馳犬驕鷹氈裘明駝攜
女載婦孺負來王之意傳神阿堵中長洲顧霽堂有長

歌紀之

鄂文端爲江蘇布政使於紫陽書院構春風亭以課士
甄綜詩文爲南邦黎獻集與其選者華亭姚培袁朱霞
常熟盛元光趙貴樸邢鉞陳祖范許潮吳縣倪承茂張
進施賓曹基劉俊周豐吳江周日藻陸桂馨顧我錡沈
岑淮安許其恕靖江孫宏綸陸一清蘇州蔡書升孫達
和李德溢吳之溥楊繩武青浦胡鳴玉慈谿翁馮淵餘
姚鄖希文溧陽潘如儼通州李堂儀真伍起程世瑛江
陰蔡寅斗丹陽姜兆錫長洲沈德潛許名峯上海陸懋
恩陸瀛齡曹培選無錫華希閔楊潮觀泰州沈默朱治
崑山王景源葛宸翼寶應潘遇莘江都管宏進李鄴崇

明顧炳光江甯張堅周易穎上慎雋五十餘人陳亦韓
言子宅記閨闥門考司業文集未載盛元光樂府十五
章一曰始基命言

太祖皇帝受天明命首事建州明督師楊鎬帥五道之
兵侵東夏

太祖白旄黃鉞指麾一戰而旗靡轍亂折北不支由是
灤永披靡燕雲震動詩曰居岐之陽實始翦商又曰天
作高山太王荒之此其義也二曰宅營州蓋今之奉天
爲舜營州之域

太祖義旗旣建先取遼瀋爲家而後

太宗皇帝勤勞三駕經略中原也三曰定九鼎言
世祖皇帝爲明討賊李自成敗於獨石焚燒燕都而去
謳歌獄訟舍是無歸焉然後雍容南面兵不血刃而正
位京師也四曰蕩秦氛言闢成蒙氈卷甲縮首西竄仍
以長安爲巢窟王師逐捕自成走死湖南而後秦民得
以蘇息也五曰誅逋寇言流賊張獻忠乘亂據蜀窶箭
鑿齒封豕其民磨牙吮血靡有子遺王師討罪射而殺
之天下快心也六曰振鷺飛言王師下金陵福王遜於
姑熟隨悟天命有在率其將劉良佐來降待以虞賓而
無銜璧牽羊之禮也七曰祀會稽言魯王屯浙東聞王

師至卽避地舟山爰登會稽銘武功八曰正南海言唐
王去閩出奔薨於道而東粵番禺皆來臣服也九曰平
六詔言永明王出居緬甸知海內嚮風遂素車白馬奉
符節來歸

聖祖免其俘見而昆明邛笮罔不率俾也十曰截三蘖
言勝國降臣吳耿之徒恃鷹犬之功懷黜澁之計合從
背叛勢半天下

聖祖皇帝命將出師瓦解冰銷應時傾蕩也十一曰靜
滄波言鄭成功竊據海島結艍內犯至此而稽顙入朝
臺山鳳嶺咸籍版圖而海不揚波越裳重譯也十二曰